

# Tut mo maila svizra sin fiera

L'import da maila na renda da preschent betg pervi dal dazi aut

DA CLAUDIA CADRUVI / ANR

■ **Quest onn hai dà ina buna raccolta da maila en Svizra. En las stizuns pon ins uss cumprar las pli differentas sorts per in bun pretsch.** La stad vendan las stizuns maila importada da tuts continents. «Uss, l'atun, è mo maila indigena sin fiera», since rescha *Martin Ammann*. El è acquisitur da la firma Charles Füglistler SA. Ammann cumpra maila, paira, tschareschas e primblas. Quest onn fetschian ins puspè ina raccolta da record en Svizra, manegia Ammann. Tenor las pli novas calculaziuns possian ins magasinari a la fin da la raccolta var 65 000 tonnas maila, radund 10 000 tonnas dapli che l'onn passà. Tar la paira quintian ins cun 9400 tonnas, radund 1000 tonnas dapli ch'il 2001.

## Il dazi protegia la produenziun indigena

Novanta pertschient da la svieuta fa la Füglistler SA cun fritgs indigens. Sco grossista da fritgs furnescha ella Migros, Coop ed au-

tras chadainas da stizuns. La Füglistler SA è ina da las tschintg grondas vendidras da fritgs en Svizra.

Pertutgant l'import da maila declera Ammann: «Dapi ils 11 d'avust na dastgan ins quest onn betg pli importar maila.» La stad èsi mintgamai lubì d'importar durant in mais. A la fin da quel mais controllescha la confederaziun, sch'ils magasins èn vids. Sch'i ha anc maila da l'exteriur denturn, datti chastis. Durant quel mais da stad è il dazi sin la maila estra fitg bas. El munta be a tschintg francs sin 100 kilos maila. Suenter, cura che la raccolta indigena cumenza, paja l'importader 1.40 francs pro kilo brut. Sut talas circumstanzas na rendia l'import da maila sa chapescha betg pli, di Ammann.

## Excepciun cun «Pink Lady»

I dettia be paucas excepciuns. Ina saja la «Pink Lady». I sa tracta d'ina sort mail che vegnia apprezzada da gourmets. Quella sort possia tuttina vegnir importada, damai ch'i dettia consu-

ments che sajan prongs da pajar il pretsch aut. La «Pink Lady» vendian sulet singulas stizuns da gourmets, nua ch'il pretsch na gioja nagina rolla.

Da preschent sa stentian intgins purs da puma da cultivar la «Pink Lady» era en Svizra. Ammann è sceptic: «Igl è ina sort maila che madirescha tard e che dovra bler sulegl.»

## Granny smith pir cun digren da la maila indigena

La primavaira cura che las reservas sa sminueschan, eruescha l'uffizi d'agricultura quanta maila ch'è anc en ils magasins. Sch'ils tschalers èn prest vits, decidan ins da lubir in contingent d'import. Questa decisiun vegn prida ensemen cun ils vendiders da fritgs e cun ils pumiculturs. Per il contingent d'import vala puspè il dazi bas. En questa fasa croda mintgamai era l'import da granny smith. Ma avant ch'ils Svizzers mordan puspè en in granny verd, pon ins anc schar gustar massa sorts indigenas. Bun appetit.



Dapi ils 11 d'avust na dastgan ins quest onn betg pli importar maila.